

13. november 2018

UKA 2018/230

Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu Naalakkersuisunut kaammattuutigaa imaani pisuussutini uumassusilinni mikroplasteqassutsimik kiisalu atlantikup avannaata imartaani plastikini mingutsitsinerup qanoq siammarsimatigineranik misissuinerup aallartitseqqullugit. Misissuinerup inernerisa 2018-imi Nunat Avannarliit Killiit Siunnersuisoqatigiiffiannut saqqummiunneqarnissaat kissaatigineqarpoq.

(Aallartitat siulittaasuat Vivian Motzfeldt)

Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu Naalakkersuisunut kaammattuutaa imaani pisuussutini uumassusilinni mikroplasteqassutsimik kiisalu atlantikup avannaata imartaani plastikini mingutsitsinerup qanoq siammartigisimaneranik misissuisariaqarnermik sammitaq Siumumiit imaattumik oqaaseqarfigissavarput.

Siumup anguniarpaa sulissutiguassallugulu nunatta, imartatta avatangiisittalu mingutsitsinernut sunulluunniit illersorneqarnissaa. Silaannaap allanngoriartornerata issittumut sunniutai kiisalu nunarsuatsinni imartani plastikini mingutsitsinerup annertusiartuinnartutut sunniuteqarfigigaluttuinnagaani malinnaaffigisaqaqqissaarnissat aatsaat taamak pisariaqartigilersutut Siumumi isumaqarpugut, taamatullu qanoq iliussissat nunat allat suleqatigalugit suliarineqartariaqartutut isumaqarfigivagut.

Nunani Avannarlerni Killerni inuuniarnermut tunngaviusut pingaernerit ilagaat imaluunniit pingaarnersaavoq aalisarneq. Atlantikup avannaani imartaq eriagilluinnartariaqarippat Siumumi isumaqarpugut, imaanilu pisuussutit uumassusillit pigisagut inuussutissarsiutigilluakkagut mingutsitsinernik eqqornerlunneqannginnissaat qulakkeerniagassaralutigu.

Aarlerinartoqartoq kialluunniit takusinnaavaa. Nunarsuatsinni imartatsinnut plastikkit eqqarneqartartut annertoorejussuusut missingerneqarsimavoq, sulilu qanoq iliuseqartoqanngippat annertuninngorsinnaallutik. Nunattalu imartaani uumasut, aalisakkat timmissallu eqqornerlunneqartartut aamma takussaajartorput, ilaatigut uagut nunami maani aamma annertuumik mingutsitsinikkut atugassaqartitsinerput aallaaviulluni.

Taamaammat misissuigasuartoqartariaqarpoq, taamaalilluni qanoq iliuseqarsinnaaneq pitsaanerpaq nunat pingasuusut akornanni qulakkeerneqarsinnaaqqullugu. Kaammattuut manna tamakkiisumik Siumumiit taperserparput.

Anders Olsen, Siumut.